

Meeqqat inuusuttullu 16-init 24-nut ukiullit annertuumik innarluutillit Kalaallit Nunaata avataani uninngagallartut ukiumut marloriarlutik Kalaallit Nunaannut tikeraarluni angalanermut pisinnaatitaaffeqassasut erseqqissaavigeqqullugu qulakkeerneaqqullugulu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortamit, Agathe Fontainimit, Inuit Ataqtigiit, saqqummiunneqartoq)

pillugu

Ilaqtariinnermut Peqqissutsimullu Ataatsimiititaliap

Isumaliutissiissutaa

Siunnersuutip aappassaaneerneqarneranut saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Lars P. Mathæussen, Siumut, siulittaasoq
Inatsisartunut ilaasortaq Knud Kristiansen, Atassut, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Anders Olsen, Siumut
Inatsisartunut ilaasortaq Agathe Fontain, Inuit Ataqtigiit
Inatsisartunut ilaasortaq Mimi Karlsen, Inuit Ataqtigiit
Inatsisartunut ilaasortaq Juliane Henningsen, Inuit Ataqtigiit

Ulloq 29. april 2014-imi siullermeerinerup kingorna siunnersuut ataatsimiititaliamit sukumiinerusumik naliliivigineqarpoq.

Siunnersuutip imarisaa siunertaalu

Meeqqat inuusuttullu 16-t 24-illu akornanni ukiullit annertuumik innarluutillit Kalaallit Nunaata avataani najugaqarallartut ukiumut marloriarlutik Kalaallit nunaannut tikeraartarnissaminnut pisinnaatitaaffeqarnerisa inatsisitigut inissisimaffiata attatiinnerneqarnissaanut Naalakkersuisut peqquneqarnissaannut Inatsisartut tapersiinissaat aalajangiiffigisassatut siunnersuummi matumani siunnersuuteqartup kissaatigaa.

Siunnersuutip Inatsisartuni siullermeerneqarnera

Siullermeerinermi oqallinneq partiillu oqaaseqartartuisa oqaaseqaataat tunngavigalugit siunnersuut partiit akornanni annertuumik tapersorneqartoq maluginiarneqarpoq. Taamatuttaaq siunnersuut Naalakkersuisunit taperserneqarpoq. Meeqqanut inuusuttunullu 16-

t 24-illu akornanni ukiulinnut annertuumik innarluutilinnut innarluuteqarnertik pissutigalugu illoqarfigisamik avataani najugaqartunut tamanut aammalu meeqqanut inuusuttunullu ilinniagaqarnertik pissutigalugu illoqarfigisamik avataanut inissinneqarsimasunut ukiumut marloriarlutik tikeraarsinnaatitaassanersut oqallinnermi oqaluuserineqarpoq. Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliami suliarineqartussanngorlugu innersuussutigineqarpoq.

Ataatsimiititaliap siunnersuummik suliarinninnera

Meeqqat inuusuttullu annertuumik innarluutillit pillugit nalunaarutip atuuttup kalaallisuaa danskisuuvalu imminnut naapertuutinngitsut Naalackersuisut akissuteqaamminni paasisutissiissutigineqarmat ataatsimiititaliap maluginiarpaa. Aammattaaq akissuteqaammi allassimavoq, danskisuaa iluarsiniarlugu maannakkut suliarineqartoq, taamaalilluni meeqqat inuusuttullu 16-t 24-illu akornanni ukiullit annertuumik innarluutillit Danmarkimi najugaqarallartut ukiumut marloriarlutik Kalaallit Nunaannut tikeraarnissaminnut pisinnaatitaaffeqarnerat erseqqissaassutigineqassalluni. Taama oqariartuuteqarneq tunngavigalugu ataatsimiititaliap siunnersuummut tamakkiisumik tapersiivoq.

Naalackersuisumik apersuineq

Siunnersuutip aappassaaneerneqarnissaanut ataatsimiititaliap allannguutissatut siunnersuummik saqqummiussaqaassanersoq ataatsimiititaliap oqaluuseraa. Tamanna tunngavigalugu aammalu ataatsimiititaliap suliarinninneranut atatillugu apeqqummut pillugu annertunerusumik ilisimasaqarnissaq qulakkeerumallugu ulloq 17. Maj 2014-imi Ilaqutariinnermut Inatsisinillu Atortitsinnermut Naalackersuisumik ataatsimiititaliap apersuivoq. Meeqqat inuusuttullu annertuumik innarluutillit tikeraartarnerannut tunngatillugu malittarisassat periutsillu suut atuunnersut ersarissinneqarnissaat Naalackersuisumik apersuinermi siunertarineqarpoq. Tikeraartarnerit 16-iniit 24-inut ukiulinnut immikkut maleruagassiussinissaq eqqarsaatigalugu suliatigut pissutaasut ilaatigut nassuiarneqarnissaat Naalackersuisumik apersuinermi ataatsimiititaliamit kissaatigineqarpoq.

Aammattaaq meeqqat inuusuttullu 16-t 24-illu akornanni ukiullit illoqarfigisamik avataani najugaqarallartut ukiumut marloriarlutik tikeraarnissamut pisinnaatitaallissappata tamanna aningaasatigut qanoq kinguneqassanersoq nassuiaatigineqarnissaa ataatsimiititaliap kissaatigaa. Ataatsimiititaliap apeqquteqaataata aamma Ilaqutariinnermut Inatsisinillu Atortitsinnermut Naalackersuisup oqaatigisaasa assilinerat isumaliutissiissummi matumani **ilanngussa 1 aamma 2-tut ilanngunneqarput.**

Kalaallit Nunaanni avataanilu najugallit tikeraartarnerat

Naalackersuisut oqaatigisassaasa allattorsimaffianni allassimavoq, inuit annertuumik innarluutillit tamarmik innarluuteqarnertik pissutigalugu illoqarfigisamik avataani najugaqartut ukiumut ataasiarlutik tikeraarlutik angalanissaminnut pisinnaatitaaffeqartut.

Aammattaaq angajoqqaatut oqartussaaffimmik pigisaqartunut attaveqarnissamik pisariaqartitsisoqartillugu inuit 18-t inorlugit ukiullit annertuumik innarluutillit ukiumut ataasiarlutik immikkut tikeraarnissamut pisinnaatitaapput. Inunnut annertuumik innarluutilinnut Aasianni Ado Lyngep atuarfiani inikssinneqarsimasunut tunngatillugu, atuartut ukiumut marloriarlutik tikeraarlutik angalasarnerat ileqqooreersoq Naalakkersuisut oqaatigisassaasa allattorsimaffianni allassimavoq. Aammattaaq pisut ilaanni meeqqat inuusuttullu ukiumut ataasiarlutik angalasarnerisa saniatigut ataasiarlutik kommunit tikeraartinneqarlutik angalatinneqartartut ataatsimiititaliamit ilisimaneqarpoq. Taamaattoq pineqartumi kommunit allaffissornikkut periusaat assigiiaarunangillat. Tamanna tunngavigalugu meeqqat inuusuttullu annertuumik innarluutillit tikeraarlutik angalasarnerinut malittarisassat assigiissaarneqartariaqartut, taamaaliornikkut meeqqat inuusuttullu Kalaallit Nunaanni avataaniluunniit najugaqarallalarunilluunniit assigiimmik sullinneqarsinnaaqullugit.

Siunnersuutip aningaasatigut kingunerisassai

Siunnersuutip aningaasatigut kingunerisassanut atatillugu siunnersuuteqartup oqaatigaa inatsisitigut inissisimaneq attatiinnarneqassappat allannguutit erseqqissaanerillu pisariaqartinneqartut naammassineqallugit suliassamik piareersaasiornissap saniatigut siunnersuut aningaasaqarnikkut allaffissornikkullu nutaamik kinguneqassanngitsoq. Missingerneqarpoq suliaq taanna ukioq kaajallallugu AC-fuldmægtigip sulinerata 1/40-iaatut naleqassasoq, kr. 12.500 tikillugit akeqarsinnaassoq.

Naalakkersuisup oqaatigisassaasa allattorsimaffianni paasissutissiissutigineqarpoq, ullumikkut inuit 15-t 18-t 24-illu akornanni ukiullit annertuumik innarluutillit illoqarfigisamik avataani inissinneqarsimasut. Inuit taakku 16-t 24-illu akornanni ikiullit annertuumik innarluutillit Danmarkimi najugaqarallartut assigalugit tikeraarlutik angasinnaatitaanermik saniatigut ataasiarlutik tikeraarlutik angalasassappata 1 mio. kr.-it missaanni aningaasartuuteqarnissaq missingerneqarpoq. Akissuteqaammi 16-iniit 24-inut ukiullit pinnagit 18-iniit 24-inut ukiullit kisiisa isummersorfigineqarsimasut ataatsimiititaamit maluginiarneqarpoq. Tamanna tunngavigalugu 16-inik 17-inik ukiulinnik annertuumik innarluutilinnik Kalaallit Nunaanni ulloq unnuarlu angerlarsimaffinni inissinneqarsimasut ilanngunneqarpata malittaarisassat allanngortinneqarnissaannut atatillugu annertunerusumik aningaasartuuteqartoqassanersoq aappassaaneerinissamut akissuteqaamminni naatumik Naalakkersuisoq erseqqissaassuteqassasoq qinnuigineqarpoq.

Ataatsimiititaliap inassuteqaatai kaammattuutaalu

Meeqqat inuusuttullu 16-t 24-illu akornanni ukiullit annertuumik innarluutillit Kalaallit Nunaanni avataanilu najugallit tikeraarlutik angalasarnerannut tunngatillugu ilaatigut inatsisitigut inissisimaneq pillugu Naalakkersuisut akissuteqaataat paasissutissallu pissarsiarineqarsimasut tunngavigalugit allannguutissatut siunnersuummik

saqqummiussaqaarnissamut tunngavissaqaangitsoq ataatsimiititaliaq isumaqarpoq, taamaattumillu siunnersuut ilusimisut iluseqartoq akuerineqassasoq inassutigalugu.

Taamaattoq pineqartumi malittarisassanik periutsinillu aqutsineq assigiinngitsorujussuusut ataatsimiititaliamit maluginiarneqarpoq.

Tamanna tunngavigalugu malittarisassat periutsillu allanngortinneqaarnissaat Naalackersuisut piaartumik qulakkiissagaat ataatsimiititaliamit kaammattuutigineqassaaq, taamaaliornikkut meeqqat inuusuttullu 16-t 24-illu akornanni ukiullit annertuumik innarluutillit innarluuteqarnertik pissutigalugu Kalaallit Nunaanni avataanilu najugaqarallartut ukiumut tikeraarlutik angalasarnissaannut assigiimmik pisinnaatitaaffeqarnissaat qulakkeerneqarsinnaaqqullugu.

Allannguutissat taakku qaqugu atuutilersinniarneqarnersut aappassaaneerinissamut akissuteqaammi Naalackersuisut nassuiaatigissagaat qinnuigineqarput.

Aammattaaq inunnut annertuumik innarluutilinnut ikiorsiisarneq pillugu malittarisassat iluarsivigineqarnerini meeqqat inuusuttullu tikeraarlutik angalasarnerat pillugu malittarisassat ataatsimut naliliivigineqarnissaat ataatsimiititaliamit kaammattuutigineqassaaq. Matuma saniatigut meeqqat inuusuttullu annertuumik innarluutillit, ukiui apeqqutaatinnagit, innarluuteqarnertik pissutigalugu Kalaallit Nunaanni avataaniluunniit najugaqarnersut apeqqutaatinnagu ukiumut marloriarlutik illoqarfigisaminnut tikeraarlutik tamarmik angalasinnaatitaalernissaat pisariaqartinneqarnersooq qulaajarneqartariaqarpoq.

Tamatumunnga atatillugu meeqqat 18-t inorlugit ukiullit inissinneqarsimasut ukiumut marloriarlutik tikeraarlutik angalanissamut pisinnaatitaaffeqassasut meeqqanut inuusuttunullu ikiorsiisarneq pillugu inatsisissatut siunnersuummi siunnersuutigineqartoq ataatsimiititaliap maluginiarpaa. Meeqqat annertuumik innarluutillit meeqqatuulli allatut malittarisassat allat naapertorlugit inissinneqarsimasutuulli ilaquttaminnik attaveqarnissaminnut attassiinnarnissamik pisariaqartitsisartut ataatsimiititaliaq tunngaviusumik isumaqarpoq. Taamaattoq inuusuttut annertuumik innarluutillit ukiumikkut piginnaasamikkullu nikerartorujussuusinnaaneri taamaattumillu inunnut 24-inik ukiulinnut annertuumik innarluutilinnut killeqartitsinerup attatiinnarneqarnissaata suli naapertuussinnaasoq, meeqqalli inuusuttullu meeqqanut inuusuttunullu ikiorsiisarneq pillugu malittarisassat naapertorlugit inissinneqarsimasut 18-inut inissinneqassasut Naalackersuisut oqaatigisassaasa allattorsimaffianni allassimasoqarnera ataatsimiititaliamit eqqumaffigineqarpoq.

Innarluutillit tikeraarlutik angalanissamut pisinnaatitaaffiisa inunnut innarluutilinnut pingaaruteqarnera pissutigalugu siunissami nalunaarutikkut pinnani inatsisikkullu ataatsimiititaliap isumaa naapertorlugu maleruagassiuunneqassasoq ataatsimiititaliap

ataatsimiititaliap naggasiutigalugu oqaatigissavaa. Tamatumunnga atatillugu meeqqanut inuusuttunullu ikiorsiisarneq pillugu maleruagassat naapertorlugit meeqqat inuusuttullu angerlarsimaffiup avataanut inissineqarsimasut tikeraarlutik angalasarneri inatsisissatut siunnersuummi saqqummiunneqartumi inatsisinngorlugu iluarsineqassasoq aamma siunnersuutigineqartoq ataatsimiititaliap tassunga atatillugu maluginiarpaa.


Ataatsimiititaliap inassuteqaataa

Siunnersuut ilusimisut iluseqartoq Inatsisartunit akuerineqassasoq ataatsimiititaliap isumaqatigiittup inassutigaa.

Taama naatsumik oqaaseqarluni isumaliutissiisummilu allassimasutut paasinnilluni ataatsimiititaliap isumaliutissiisut aappassaaniigassanngortippaa.




Lars P. Mathæussen,
Siulittaasoq




Knud Kristiansen




Karl-Kristian Kruse



Anders Olsen



Agathe Fontain



Mimi Karlsen



Juliane Henningsen



INATSISARTUT

**Ilaqutariinnermut Peqqissutsimullu
Naalakkersuisoq
Martha Lund Olsen**

Ulloq: 12. maj 2014

J.nr.: 01.38.01.04-00024

**Arfininggornermi ulloq 17. maj 2014, nal. 14.00-imiit 14.30-imut Inatsisartut
ataatsimiittarfianni 2-mi Ilaqutariinnermut Peqqissutsimullu Ataatsimiititaliami
Naalakkersuisumik apersuinissamut ageqqusissut.**

Ilaqutariinnermut Inatsisinillu Atortitsinermit Naalakkersuisumik apersuinissamut
Ilaqutariinnermut Peqqissutsimullu Ataatsimiititaliap matumuuna aggersarpaa.

Tikeraarluni angalasarneq pillugu UPA 2014/176-imut siunnersuummut tunngatillugu makku
Naalakkersuisumik apersuinermit ataatsimiititaliamit oqaluusererusunneqarput:

1. Kalaallit Nunaanni avataanilu najugaqarnermi tikeraarluni angalaneg.

Meeqqat inuusuttullu 16-t 24-illu akornanni ukiullit annertuumik innarluutillit
innarluuteqarnertik pissutigalugu Kalaallit Nunaanni illoqarfinni allani
illoqarfiginngisamini najugaqarallartut meeqqat inuusuttullu 16-it 24-illu akornanni
ukiullit annertuumik innarluuteqartut danmarkimi najugaqarallartut assigalugit
ukiumut marloriarlutik tikeraarnissamut angalasinnaatitaanissaat qanoq qaqugulu
qulakkeerniarpiuk?

Siunnersuutip siullermeerneqarnerani oqaatigineqarpoq inuusuttut Aasianni Ado
Lyngep atuarfiani najugaqartut kaajallaasitaq 7/82 malillugu
maleruagassiorneqartut kiisalu ukiumoortumik ataasiaannarlutik tikeraarlutik
angalasinnaatitaasut oqaatigineqarsimasoq.

2. Assigiimmik atugassaqartitsinerup aningaasatigut kingunerisassai.

Ukiumoortumik marloriarluni tikeraarluni angalanissaq eqqarsaatigalugu inuusuttut
16-t 24-illu akornanni ukiullit annertuumik innarluutillit tamarmik assigiimmik
pineqarnissaat qulakkeerneqaraluarpat tamanna aningaasaqarnikkut
kinguneqassava? Tamatumani Kalaallit Nunaanni avataaniluunniit
najugaqarallarneq eqqarsaatigalugu.

3. Assigiimmik pineqarneq.

Tikeraarluni angalasarnerit eqqarsaatigalugit inuusuttunut 16-t 24-inik ukiulinnut
annertuumik innarluutilinnut immikkut ittumik maleruagassaqartoqarneranut
tunngavigineqartoq naatsumik nassuiaateqarfigisinnaaviuk.

Meeqqat inuusuttullu annertuumik innarluutillit assigalugit, meeqqat inuusuttullu 24-
t angullugit ukiullit illoqarfigisamik avataani najugaqarallarlutik tikeraarnermi

angalasinnaatitaanermut pisinnaatitaaffeqarpat aammalu
assigiinngissuteqartoqarpat tamatumunnga nassuiaateqarfigisinnaavigit?

Naalackersuisunut ilaasortamik apersuinerup malitsigisaanik apeqquteqarsinnaaneq
ataatsimiititaliamit naatsorsuutigineqarpoq.

Naalackersuisunut ilaasortamik apersuinerimi sapinngisamik annertunerpaamik
Naalackersuisunut ilaasortap ataatsimiititaliallu akornanni naalackersuinikkut pissutsit
oqallisigineqarnissaat ataatsimiititaliamit anguniarneqarpoq – tassa pingaarnersiunerit
anguniakkallu pillugit. Oqaloqatigiinnerit sapinngisamik atuffasserpalaartuunnginnissaat
kissaatigineqarpoq.

Naalackersuisumik apersuinermut atatillugu siuliani taaneqartut apeqqutit pillugit
allakkiamik kalaallisut danskisullu ataatsimiititaliap pissarsisinneqarnissani kissaatigaa.
Allakkiaq kingusinnerpaamik Naalackersuisunut ilaasortamik apersuinerup kinguinngua
qarasaasiakkut jhh@inatsisartut.gl-mut nassiunneqarnissaa kissaatigineqarpoq. Allakkiaq
nassarneqassappat Naalackersuisumillu apersuinerimi atorneqarluni Naalackersuisumik
apersuinissaq sioqqutitsiarlugu ataatsimiititaliap oqaluttaanut assilineru tunniuneqassasoq
qinnutigineqarpoq.

Inussiarnersumik inuulluaqqusillunga



Lars P. Mathæussen
Ataatsimiititaliap siulittaasua



Ilanngussaq Bilag

Ilaqutariinnermut Peqqissutsimullu Ataatsimiititaliaq
Psofboks 1060
3900 Nuuk

FM 2014/176 pillugu Ilaqutariinnermut Peqqissutsimullu ataatsimiititaliamut apeqquteqaatigineqartunut akissuteqaatit.

15-05-2014
Sags nr. 2014-097887
Dok. nr. 1578672

Pineqartoq 1. Nunatsinni nunattalu avataani inissinneqarsimasut tikeraarsinnaatitaanerat.

§ 50 naapertorlugu innuttaasut annertuumik innarluuteqartut angerlarsimaffimminnilu najugaqarsinnaangitsut ukiut tamaasa ataasiarlutik angerlarsimaffigisaminnut tikeraarsinnaatitaapput. Tamatuma saniatigut 18-t inorlugit ukiullit § 50 naapertorlugu tikeraarsinnaatitaallutik.

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

§ 50 naapertorlugu innuttaasoq annertuumik innarluuteqartuusimaguni, tamannalu toqqammavigalugu angerlarsimaffiginngisaminit najugaqartinneqarsimaguni, ukiumut ataasiarluni angerlarsimaffigisaminnut tikeraarnissamut akiliunneqarsinnaasarpoq. Tamatumani aalajangiisuutinneqarpoq, pineqartup angerlarsimaffiup najugaqarfigisallu avataani inissisimaffeqartinneqarsimanissaa, tassami aamma piffimmi pineqartumi taassumunnga naleqqussakkamik najugaqartitsinissaaq ajornarsimassappat. Piffimmi najugaqarfigisap avataannut inissinneqarnissaaq kommunalbestyrelsip Naalakkersuisulluunniit tamanna pillugu aalajangiivigisarpaat.

§ 55: Innuttaasut 18-t inorlugit ukiullit aammalu annertuumik innarluuteqartut, tamatuma saniatigut ukiumut ataasiarlutik angerlamut akiliunneqarsinnaasarpup, tamatumaniilu siunertarineqarluni pineqartup angajoqqaatut akisussaassuseqartumut attaveqartuaannarnissaat. Taamaattoorli meeqqap katsorsarneqarneranut akornutaanngitsumik angalanissaaq aaqqissuussiffigineqarsimassalluni.

Innuttaasoq 18-leereersimasooq aammalu § 50-mi pineqartunut akuusoq, immikkut pisariaqartitsinera naapertorlugu ukiumut ataasiarluni akiliunneqarluni nunatta iluani nunatsinnulluunniit akiliunneqarsinnaavoq, tamatumani qanigisaasup annertuumik nappaateqarnera, toqusimanera imaluunniit ilineqarnissaa pissutigalugu najuukkiartornissaminut akiliunneqarsinnaalluni. Immikkut pisoqartillugu tamatuma saniatigut § 50-mi pineqartut, soorlu qanigisap ilaannit immikkut nalliuttorsiuuteqartoqassatillugu imaluunniit nappaalasoqarsimatillugu akiliunneqarnissaminut aningaasaliiffigineqarsinnaapput.

Innuttaasut annertuumik innarluuteqartut aammalu Ado Lyngep Atuarfiani najugaqartinneqartut, Ilinniartitaanermut, Ilageeqarnermut, Kulturimut aammalu Naligiissitaanermut Naalakkersuisoqarfiup Ilaqutariinnermut Inatsisinillu Atuutitsinnermut Naalakkersuisoqarfiimmuut ilisimatitsissutigisimavaa, Ado Lyngep Atuarfiani najugaqartut nalinginnaasumik ukiumut marloriarlutik najugaqarfigisaminnut tikeraarnissaminut akiliunneqartartut (Juulikkunni aasaanerani).

Pineqartoq 2. Naligiissitaaneq pillugu aningaasatigut kingunerisassai.

Ilaqutariinnermut Inatsisinillu Atuutitsinnermut Naalakkersuisoqarfiup annertuumik innarluuteqartut naligiissinneqarsinnaanerit siunertaralugu immikkut aningaasartuutigineqartussanik naatsorsuisimapput, tamatumani pineqarlutik namminersornerusut ulloq unnuarlu najugaqarfiutaani najugaqartuusut.

Ulluni makkunani annertuumik innarluuteqartut 19-t aammalu 18-niit 24-t tikillugit ukiullit nunatsinni ulloq unnuarlu angerlarsimaffinni najugaqartinneqarput. Taakkunannga 19-usunit oqarluaannaraani 15-t ukiumut immikkut akiliunneqarlutik angerlarnissamut akiliunneqartalarnissamut pineqarput. (tassanimi apeqqutaammat illoqarfigisap avataannut tassaniluunniit ulloq unnuarlu angerlarsimaffimmut inissinneqarsimaneq).

Taamaattumik naatsorneqarsimavoq innuttaasut 15-usut aammalu annertuumik innarluuteqartut immikkut akiliunneqartarnissaat qanoq aningaasartuuteqarfiusinnaassanersoq. Naatsorsuusiornermi ilanngunneqarsimapput billettimit, ineqarnissamut, ingiorteqarnissamut, ullormusiaqartitsinissamut, nerisaqartitsinissamut aammalu immikkut nassataqartitsinissamut aningaasartuutaasinnaasut. Tamakku tamarmik katillugit 1. mio koruunit missaani akeqartussaassimapput.

Pineqartoq 3. Naligiissitsineq.

Tamatumani isiginiarneqarsimapput inuusuttut 16-niit 24-it tikillugit ukiullit, tassami pineqartut immikkut pisariaqartittarmassuk angajoqqaaminnik ilaqtaminnillu allamut inissisimagallarnertik toqqammavigalugu attaveqaateqartinneqartarnissartik. Inuusuttut arlaatigut innarluuteqartut ukioqqortussusertik apeqqutaatillugu piginnaassamikkut pisariaqartitsinerat assigiinngisitaarsinnaasorujussuusarput, taamaattumillu soorlu Danmarkimi najugaqartinneqarsimagunik ataasiakkaarlutik immikkut pisariaqartitsinerat arlaatigut aaqqiiviginiarneqartariaqarlutik.

Inussiarnersumik inuulluaqqusillunga
Med venlig hilsen

Martha Lund Olsen